

سلسلة العامة الجديدة

# ليه ييموت الشعرا؟ الروح

شعر بالعامة المصرية



عماد سالم

## مؤسسة يسطرون للطباعة والنشر والتوزيع



### رئيس مجلس الإدارة

عماد سالم

### المدير العام

رنا عماد

الطبعة: الأولى

الكتاب : ليه بيموت الشعرا؟! (الروح)

تأليف : عماد سالم

تصنيف الكتاب : ديوان شعر

التصميم والإخراج: حسن عبد الحليم

المقاس: ١٤ × ٢٠

رقم الإيداع: ٧٧٩٠ / ٢٠٢٥

الترقيم الدولي: 6 - 819 - 993 - 977 - 978

العنوان : برج الياسمين الدور السادس ٢٧٦ ش فيصل .. الجيزة

التليفون : ٠١٢٢٩٣٠٠٠٢٩ - ٠١١٥٧٧٦٠٠٥٢

Email : Yastoron@gmail.com

موقعنا على الفيس بوك : مؤسسة يسطرون لطباعة وتوزيع الكتب

حقوق الطبع والنشر والتوزيع محفوظة للمؤلف ولا يحق لأى دار نشر أو مؤسسه أو جمعيه أو أى شخص كان بتنفيذ هذا العمل أو النشر أو التوزيع إلا بموافقه كتابيه وموثقه من المؤلف .



بِسْمِ اللَّهِ الرَّحْمَنِ الرَّحِيمِ

﴿وَيَسْأَلُونَكَ عَنِ الرُّوحِ قُلِ الرُّوحُ مِنْ

أَمْرِ رَبِّي وَمَا أُوتِيتُمْ مِنَ الْعِلْمِ إِلَّا قَلِيلًا﴾

[الإسراء: ٨٥]

الرُّوح: حياة الإنسان





«الروحُ جسمٌ مخالفٌ بالماهية لهذا  
الجسم المحسوس، وهو جسم  
نوراني عُلوي خفيف حي متحرك،  
ينفذ في جوهر الأعضاء، ويسري  
فيها سريان الماء في الورد، وسريان  
الدهن في الزيتون، والنار في الفحم».

[الروح لابن القيم: ص ٢٤١]





## توأم الروح

«عاش على الأرض كائنٌ، قُسِمَ  
نصفين: رجل وامرأة، عاش كل منهما  
يبحث عن نصفه الآخر. ولكن لا  
يلتقي أحدهما الآخر إلا مرة واحدة،  
فإما أن يتمسك به وإما أن يتخلى  
عنه، حتى إن بعضهم يقابل نصفه ولا  
يكتشف ذلك إلا بعد فوات الأوان».

[أسطورة يونانية]





فَقَالَ فِرْعَوْنُ لِعَبِيدِهِ:  
«هَلْ نَجِدُ مِثْلَ هَذَا رَجُلًا فِيهِ رُوحُ اللَّهِ؟»

[سفر التكوين: ١٤ : ٣٨]

«لا شيء يؤذي الروح أكثر من بقائها  
عالقة في مكان لا تنتمي إليه».

[عباس محمود العقاد]





## توأم الروح

«من تحب ليس نصفك الآخر، هو  
أنت في مكان آخر، في الوقت نفسه».

[جبران خليل جبران]

«يرجع التراب إلى الأرض كما كان  
وترجع الروح إلى الله الذي أعطاها».

[سفر التكوين: ٢١ : ٧]





﴿رَفِيعُ الدَّرَجَاتِ ذُو الْعَرْشِ يُلْقِي الرُّوحَ﴾

[غافر: ٥١].

صدق الله العظيم

(الروح: الوحي)







## أول طريق للأرض

علِّمْتَنِي كلَّ الأسامي..

حَفِظْتُهَا..

ما فَهِمْتُهَاش.

كان نفسي أعرف قبلها

معنى الحياة

وليه الزمن قبل الساعة دي

ما ابتدأش؟!

كان نفسي أفهم كل شيء

وارسم لروحي مِية طريق

كلَّ الأسامي اتبَخَّرَتْ





والحل إليه؟!

أول طريق للأرض

مع أول سؤال فيها اتخلق

أكبر فضيحة ع الملاء

لما تناديهم كلهم

وتقول لهم

ادُّوا الأسامي للمعاني والصور

كل الملائكة هيستخبوا م الحرج

والجنة تتبسّم قوي

وكأنها رافضة وجودي في السما

وشيطاني يتنطّط فرح

ويبص لي

وتبص لي





وتقول لي: إنطق!  
قول لهم  
وانا زِيُّهم  
وأقل منهم أجمعين  
صلصال وطن  
والأرض فكرة  
وُلَسَّا نائمة فمهدّها  
وانا ما استحقّش أي شيء  
ولا رحمتك  
ولا جنّتك  
ولا حدّ يخضع لي بسجود  
من قبل طاعة ولا اختبار!  
لو يزرعوني وسط نار





بتقول لها برد وسلام  
في التَوَّهِّدا وتنطفي  
لو حُوت بلعني  
تؤمره يفتح قوام  
على أول الشط الأمان  
ويُحْطَنِي ويختفي  
هو انت ليه بتحبني؟!  
نفسى افهمك  
كان فيها إيه لو سبتني!  
لما رموني فْ بير غويط  
نجيتني ليه؟!  
طب سبتهم يرموني ليه؟!  
ما انا زِيُّهم





أنا أصلي واحد منهم  
كان نفسي في مُرَاة العزيز  
فكّرت فيها كثير قوي  
كان نفسي مرّة تضمّني  
لو حتى نار  
ولا همّني يحصل لي إيه  
نجيتني ليه؟!  
طلّعتني م البير أمير  
في أيديّ مفتاح البلد  
كل الكواكب يسجدوا  
طالبين رضايا والممدد  
دمع الحداشر ع الطريق  
وانا ما استحقّش أي شيء





أنا مش بريء  
كان نِفْسُهُم في الإِصْطِفَاءِ  
العدل ينزل م السماء  
يبقى المطر  
وَحَدَلْتُهُمْ  
وَنَصَفْتَنِي  
ما اعرفش ليه ميّزْتَنِي  
حسّيت ساعتها بالخطر





## ليه يَمُوتَ الشُّعْرَا؟!!

وليه يَرْضَى إِلَه الخِير يعيش جنبه..

في ملكوته.. عبِيد الشر؟!!

ويرمِينِي أَنَا وروحي

في سَاحَة حرب تَخطِفُنَا

في دُنْيَا نعيشُهَا نَتَعَذَّبُ

في كَرِّ وَفَرِّ

ويصلِبُ ضِيَّ كَان فرحَان

لأنه معجزة للشمس

وأول بيت نطق ع الأرض

وفيه مَخَالِيق كَثِير جَدًّا

وقال إنسان

وكان سَرَّ الخلود فيها





فنسيوا أنفسهم عبدوه  
وزرعوا جبهته بالورد  
ومية بركان فتح بقة  
بيبلع في الي باقي من أغاني الأرض  
ما فيش غير شوك في وجدانه  
وصوت الرعد في ودانه  
كأنه نشيد جميل جدًا  
غنا لفيروز  
قلوب عشاق وألف سؤال  
ليه جنة ونار؟!  
وليه دايماً  
زعيق الشمس بيخوف بنات الضل؟!  
وليه يخلق معانا الذل؟!  
وليه ييموت الشعرا؟!  
حقيقي لسا مش عارف  
ومش شايف







ومتَحَيَّر

في قلبي صراع

وانا مَرَمِي في عز النار

أَلَاقي طيف يَوْصِّيني

أَخْلِي بالي م النعناع

وأفضل جنبه وانا خايف

ومش سامع غنا العصافير

ومش عارف لوحدي أطيّر

ومش شايف

لقيت نوري فارقتني وُضاع

وقلبي ف رَكْنَتْهُ صَدَا

فقال الله: شُجَاعًا كُنْ!

لَكِنْ مَا قُدِرَتْش اصْلُبْ طُولِي م الخَصَّة!





## جبريل ما جاش

وفُضِّلْتُ وحدي في الفراش

خَرَجَ النبي

ومعاه ملايكة تحرسه

بعديهِ عَلَيَّ

وفُضِّلْتُ وحدي في الفراش

فُضِّلْتُ ادَّوَّرَ في الآيات

على آية اقولُها واختِفي

جبريل ما جاش

ولا همَّسَ لِي بِآية واحدة م الكتاب

أربع حيطان ما لُهمَّشَ باب

أخرج منين؟!





وصوت غراب!  
الصوت واصل لي وبُوضوح  
«لو يَتَّقَتِلْ بضربة واحدة م الجميع  
يصبح سراب  
وما فيش حساب»  
يا ربنا..  
اجعل ما بيني وبينهم السدّ الكبير  
قدام عينيهم أو وراهم أَبْقَى طير  
أَهْرَبَ واطير  
من بين أيديهم يا رحيم!  
(البوكس مِتْرَشَق عساكر  
بالنيران متسلحين  
وسرينة تعوي بصوت لئيم  
والراديو من عند الجيران





قرآن كريم  
وصوت مذياع قطع الآيات  
وقرا البيان)  
قبضنا على مجرم خطير  
إرهابي كان حاقد حقير  
عاوز يخلي الأغنيا  
قاضى ووزير  
عاوز فلوس الأغنيا تكسي الفقير  
وتشتري أكله ودواه  
أنا قُلت: ياه!  
إرهابي! لا!  
كان نفسي اكون زي النبي  
واخرج معاه  
أو قلبي يشبه للولي





واتبع خطاه  
واحفظ معاه كل الآيات  
أقولها واعمي المخبرين  
لكن الخطايا تَقْلِتْنِي  
ونِيْمْتَنِي في الفراش  
خرج النبي  
ومعاه ملايكة تحرسه  
بَعْدِيهِ عَلِي  
وَفُضِلْتُ وحدي أنتظر  
جبريل ما جاش!





## الخلق بيوت

الروح مش طاقة نور  
ولا ضل بيفرح لَمَّا بيلمس جسمك  
يتسرب فيك  
يتوَّس بيك  
الروح قبليك  
ضحك الشبابيك  
والخلق بيوت  
بتعزّل أوقات  
تَتَنَقَّل  
وبتسكن فيك





وانا روحي سابتني  
بقيت فاضي  
من غير سكان  
عاش وحداني  
ومش عايش  
دائماً قلقان  
والحزن شريك  
أنا كنت شاريك  
باقْسيمْ ويّاك اللقمة/  
النور  
والضلمة تقسّمنّا  
لحطان وبيوت  
وغدّرتْ





غادرت البيت

وصعدت

اسرع م الصوت

والصبر خيوط

تعشق بعضها

وتضفر لجبال تعابين

والوحدة تابوت

تعابين الصبر بتشنقني

وانا وحدي هاموت

لو ثانية تفوت

وانت مفارق

يبلعني الخوف

مش قادر اشوف







من غيرك ضيّ  
مين غيرك ضي؟!  
مش لاقى عُينَيَّا  
النار سكنت في مكانك فيَّا  
وسرحت لوحدك في الدنيا  
تايه وشريد  
وفايطني وحيد  
الجسم الفاضل يتألم  
من غير الروح  
وشوارع قلبي المهجورة  
ما فيهاش مطرح لاتنين عشاق  
مليانة جروح  
اتشقّ الشارع نهرين





فجريت  
وبقيت ضلين  
فتخاف الروح  
وتحاول تهرب من سجنى  
وتروح على فين؟!  
من غير الجسم المتألم  
الليل ييميل  
يتسحب  
وعينه رجلين  
ويحاول يشرب من دمعي  
والبير مليون  
والدمع يفيض  
ويشق حطان الليل فتميل





وترش الضلمة على الشارع

وانا باعطش نور

الدمع بينزل متكسّر

وكإنه قزاز

والخوف متخفّي ومتربص

والكون برواز

والعالم ميّت م الأول

العالم تاه

بيحاصر فينا ويحبسنا

ويقول دي حياة

هنعيشها وبرضك هنعاني

ومسير الحي يموت تاني

أنا عارف إننا روح واحدة





بتلف ما بين جسمي وجسمك

باتلفح بيك

والخطوة معاك بتقربني

لبيوت الشعر الساكناني

ولضيّ غينيك

بازرع فدادين بنجوم في مدار

بتنوّر لنا ليل ونهار

والضلمة فراق

عاوز تمشي؟

إزاي قررت انك تمشي؟!

وازاي هنقسّم روح واحدة؟!

مش كنت تقول لي أنّ احنا اتنين؟!





## الليالي الأربعين

ذهب البنات من لمعته عبدوه  
وبدمعته غسلوا الذنوب  
بيطهروا بيه القلوب  
وبيخلقوا منه الإله  
وييسهروا حوالين جلالتة يحرسوه  
والقلب يفضل في طواف  
والعقل ساكن في الغروب  
العجل يلمع يرقصوا  
ويطوفو طالبين المدد  
وانا لَسَّا تايه وسطهم  
أحدٌ أحدٌ





وانت السبب  
سايب أخوك مرعوب في عز المعركة  
شفاف وحيد  
حرية في إيدى العبيد  
واخذ معاك الشمس بالنور والدفا  
وأخوك بعيد  
بردان قوي  
رايح تكلم ربنا  
ما هو كل وقت بيسمعك!  
وانا باسمعك  
بتكلمه  
وقملي تقرا في الكتاب  
والروح ترفرف بالآيات  
وانا أموت  
وانت تعيش





طول الليالي الأربعين  
وانا وحدي باصص ع السما  
يا رب موسى ما ينسانيش  
ما اقدرش اكمل رحلتك  
إنت ابتديت  
فانشق نوري ف نصك الضلمة  
وسبتني ف نص الطريق  
إزاي يبجي لك قلب تهجر مطرك؟  
خايف عليك  
وف عز خوفا بالمحك  
فرحان  
ودموعي دايرة ف ضحكتك  
جاي لك بوعد من السما  
أفضل أمهد سكتك  
أبقى الونيس





وابقى السند  
مهما تطوّل رحلتك  
أنا استجابة ربنا لداك  
أنا ترجمان  
لو همّ عاوزين يفهموا  
هافضل معاك  
الكلمة كانت كلمتك  
وكلمتي من غير وجودك ما تساويش  
بتسييني ليه في أيدين بشر  
كان حلمهم يبنوا سلام للسماء  
علشان يحاربوا ربنا؟!  
خايف قوي  
وانا وسطهم وخذاني  
مستني المصير  
أنا كنت قبلك في الحياة







وانت الكبير  
أنا مش بعيد عن ربنا  
لكنك انت الاختيار  
جَوَّايَا نوره ما ينطفيش  
طول الليالي الأربعين  
وانا قلبي حاسس بالنهار  
بالنور يفتح سِغَّتِي  
بالصوت بيهتف من بعيد  
إنت شريكي ف رحلتي  
بسفينة بتعوم في السما  
قاعدين على كتف السحاب  
اتنين  
نتهَجِّي في حروفنا الجديدة  
نُكَلِّمُه  
واحنا سوّا مع بعضنا





وما فيش هروب  
نحكي له كل اللي جرى  
العَجَل سيطر ع القلوب  
الخلق عُبَاد طَوَافِين  
حوالينه بِمَحَبَّة وخشوع  
لو كنت ناوي ع الرجوع  
آخرك يومين  
لو لَسَّا محتاج ترجمان  
لو لَسَّا قلبك مركبك  
صافي وحنون  
اركع كمان لله  
وعيط بين إيديه  
وقول له رَجَّعني لهارون





## اضربوه ببعضها

وقع القتيل  
الدم ما ريش يروي أرض  
والروح تعيِّط  
والعياط مش دمع..  
ورد!  
وله عير بالحزن رق  
لما استخبَّأ جُوءًا شق  
لاجل امَّا يعرف مين قتل  
دمعه بالدم اختلط  
أكبر غلط  
بسرعة كانت مذهلة  
اتفجَّرت جُوءًا عيون أهل البلاد





براكين غضب  
وخوف وحيرة وأسئلة  
مين اللي يرضى للجسد  
كهف الألم  
يعيش في دنيا مظلمة  
والروح بتُغرب م الجسد  
تشرق لغربة في الفضا  
وتقول:

يا كون مجروح،  
أنا اللي عارفة مين قتل  
أخبي عنك ولا ابوح؟  
يا روح ما قبلك أي روح  
طول ما انتِ قاعدة بتزرعي  
في غيط جسد  
العطر منه يفوح  
ريحة الفراق قاسية قوي





طب قَتَلَهُ ليه؟  
مش لاقية رد!  
اتلفتت مش شايفة حد  
مش لاقية ناس  
قالت: يا رب!  
العدل عندك والقصاص!  
{قُلْنَا اضْرِبُوهُ بَعْضَهَا}  
ينطق هابيل الي اتقتل  
ويقول قابيل  
يبقى الدليل  
أصل الحكاية ونبعها  
نعرف ساعتها الي حصل  
واهو مية هابيل منّا اتقتل  
ومية قابيل  
لا حد يعرف شكلهم  
ولا حتى ينطق إسمهم





من غير دليل  
 قوموا ادبحوها أولاً  
 ثُمَّ اضْرِبُوهُ بِبَعْضِهَا  
 وهتعرفوا مين القاتل  
 والبقرة دي ملكي أنا  
 اتجمعت فيها الصفات  
 كانت تسر الناظرين  
 سر الخلاص عندي أنا  
 الكل يركع بالرجاء  
 لو كُنتو فعلاً مؤمنين  
 قوموا اغمروني بالذهب  
 سبحانه ربي اللي وهب  
 سبحانه رب العالمين  
 وسمعت صوتك وقتها  
 واضح كأنه صوت أدان  
 مش قلت لك ربك كبير؟





قادر يغيّر كل شيء  
وَيَمْلِكُكَ سلطة وجاه  
الموت مخيف  
لكن في حكمة ربنا  
يبقى طريقك للحياة  
للمجد والنور والأمل  
تؤمر وتنهي وتبتسم  
وقمّر من كل اتجاه  
فتلقى رحمة ربنا





## الشجرة

المركب والباب إخوات  
من نفس الشجرة الأم  
دبحوها الناس  
واتحكموا في مصير الكل  
شربوا الضل  
وسابوا الشمس تلهب  
كل فروع الشجرة  
واتشردوا لِأولاد  
المركب ساب الصياد  
واقمشَّى في عيون البحر







شاف المِوَج وفِّ حُضْنِه نخيل

صوته بِيَعْلَى بالترتيل

والغنوة جواه بتئن

فاكر إنه هيقدر ينسى

لكن كل ما يَلْمَح شجرة

قلبه يحن

يجري عليها

يبوس رجليها

ويُفَضِّل يبكي

ويعيط شبك الصياد

لَسَّا الباب واقف ع الباب

بيدور

على بيت عَمْران





يَجْمَعُ أَهْلَ وَخِلَانِ  
يَحْرُسُهُمْ قَلْبُهُ الْمَفْتُوحِ  
وَيَرِاقِبُ بَعْيُونَ سِحْرِيَّةَ  
مَفْتُوحَةِ لَيْلٍ وَيَا نَهَارِ  
وَمَمْلِي وَاقِفِ زَنْهَارِ  
دِي طَبِيعَتُهُ سَلْسَالُهُ وَقَلْبُهُ  
مِنْ عَيْلَةِ أَصْلِهَا أَشْجَارِ  
لَسَا الْبَابَ بِيَعِيطُ لَمَّا  
إِيْدُهُ بَتَلْمَسُ إِيْدَ نَجَارِ  
جِيَّ بِكُلِّ قَسَاوَةِ قَلْبِهِ  
بِيَدِيقِ فَ قَلْبُهُ الْمَسْمَارِ  
بِيَقْطَعُ مِنْ لَحْمِهِ الْحَيِّ  
وَبِيْدِيحِ قَلْبُهُ مِنْشَارِ





لَسَّا الباب ييحاول يعرف  
إمتى هيبجي أخوه المركب  
إمتى هيهرب م الصياد  
ويودّيه للشجرة الأم  
ويوضّيه من ندا أوراقها  
ويحذّرها م الي سرقها  
ويجمّع كل الأولاد





## الغار

كنا ثلاثة فُ كادر واحد  
الصورة طلعت لي أنا  
كما ضل طاليل بين نورين  
نور عن يميني ظل  
مالي السما والأرض  
ونور محاط ضلنا  
كان أصله نار  
كان الحرّس ع الغار  
بيغنّوا غنوة مزعجة  
ومصمّمين يئذوا النبي





وانا قلبي طاف حواليه  
يتحدَّى وحده جيش غبي  
قال النبي:  
إِنَّ الإِلَهَ معنا  
حسّيت ساعتها الخوف بيسمعنا  
الخوف سحاب عيِّط مطر  
بيّن ملامح وشي في الصورة  
وما فيش هنا غيري مِنْ الثّوار  
والغار  
كأنه روضة من الياسمين  
عبيرها واصل للسحاب  
صوت طيَّارات بتغادر الموقع  
صوت انسحاب





والصوت يبيعد للغيباب

حتى المدافع بطّلت

صوت القيادة للجيش

الانسحاب

الانسحاب

الانسحاب

حسيت ساعتها بالفرح

مع إنا قلة قليلة مؤمنة

وحصّنا كان الإيمان

واحنا انتصرنا برّبنا

انفضّ لحظتها الحصار

ولا صوت غارات

ولا ضرب نار





والكون أمان  
والشمس عادت للنهار  
لكن فضّلنا في السما  
والرحلة بتطوّل قوي  
والأرض بعدت عننا  
كل البلاد قفلت بيبانها فْ وشّنا  
وما فيش رجوع  
صوت ضرب نار  
طيارة تايهة في الهوا  
لو فكّرت تنزل في يوم  
تلقى العساكر في المطار





## الأحلام رغيف

لما الحروف تعلن مواعيد الوصول

لمحطة العشق

اللي مش هيكون بها

مكان لغيري ع الرصيف

والقلب يسجد في الوصول

مش دي الأصول؟!

قلبي اللي جاي لك من بعيد

تبقي له نظرة تبلّ ريق

تكوني له عيد

قلبي اللي عاش مليون سنة

لو تحضنيه







يصبح وليد  
وعُينيكِ أُمي وصحبتني  
وتبقي آخر رحلتي  
وانتِ البداية  
لما تيجي في بالي فكرة إني أعيش  
إني أموت  
وانا باندھك  
ما تبخلّيش  
ومدّي إيدك بالدفا  
من بين شعاع الشمس لما تطمّنك  
إنك بداية رحلتي  
يا دينيتي  
وهتلاقيني ف قلبها  
أبواب بتفتح ع السما





### متبسمّة

لما غيطان القمح ترفض تبتسم

والميّة تدبل م الجفاف

والنيل يبات عطشان قوي

والشمس تهرب م السما

وتجوع دَقَا

تبقى الوفا

وتبقى معنى للغرام

والعشق لما يكون عفيف

والكون شريف

مبسوط وعاشق زينا

وبيحلم إنه يكون براح

فارد جناح

يطير سعادة بعشقنا





كون زَيْنَا  
يطلع صباح  
حلمه بيشبه حلمنا  
متوضي من نهر الغرام  
براح مباح  
صمته كلام  
عاشق بيعرف ربنا  
لا يخون حبيب  
ولا يستجيب  
لشيطان يوزه ع الفراق  
مخلص لغنوة بَتْتَزِرِع  
وفروعها تكبر كل يوم  
لو تلج نازل م السما  
أو رامي جدره في الغيطان





والصقعة تطرح ع الشجر

أنا قلبي مليون بالدفاء

ولو الشموس

متكتفة

ونائمة حافية ع الرصيف

والضحكة مني بتتسرق

كفاية إني أحضنك

وأخبز الأحلام رغيف





## أرواح الحزن

أنا جاي م البحر اللي يوڊي

ولوحدني أنا جيت

ما لقيتش عيونك تسترني

عريان وغريب

سقعان م الغربه

مع إن النار م الشوق قايدة

لكن بردان

وعيونك بيت

مش فاكّر إن كنت باعيط

ولا عارف إمتى احتلّنتني

أرواح الحزن





ولا زلت باقاوم وباغني  
وعيونى تشاور ع السكة  
وف روجى سواقى تدق الغيط  
وعيونى تمطر تروي الزرع  
يطلع أصفر دبلان وحزين  
أنا أطلع مين  
أنا أنزل فين  
السكة لقلبك مقفولة  
كل المفاتيح ما بتفتحش  
وأنا عاشق م الوهلة الأولى  
أنا مش هامشي  
انا هأخدك وامشي  
مش هاوصل  
غير وانت معايا





الرحلة أولها نهاية  
والمرّ ان كان يطلع منك  
حاسّه دَوَايا  
إنتِ الغاية  
ووسيلة قلبي انه يغني  
وانتِ الآيّة  
كل اّمّا انساها تفكرني  
بالقاها فْ مُصحف جوايا





## روح خضرا

أنا المصلوب على الشجرة

وعارف إن انا مقصّر

ما جبتش حلم متفسّر

يطير منه شعاع يوصل

لقبل ما تنتهي قدمك

وتتعرّس

في نجمة من بنات الشمس

عاشقاني

وعارفة إن انا أكبر

طريق محفور في وجدانك

عملت مظاهرة علشانك

عشان اصغر







وما قدرتش  
أكون غير ضيّ أغنية  
وكعبة تطوفي حوالياً  
ونجمة شاردة في الملكوت  
وحيدة في سما زرقا  
فاتوها رفاق  
ومش فارقة  
معاها إنها تنور  
طريق ضلّة  
عليه الضيّ بيدور  
فيهرب  
في شوارع ناسية عناوينها  
ولابسة وشوش  
بتتنكر  
من اللي كانوا عارفينها  
وتهرب م اللي عاشقينها





## رصيف

رصيف عليل

عَمَّال بيهرب من عيال البياعين

شارع حزين

كل البيوت رفضت تحازي فُ صف واحد

وناس وشوشها شكل واحد

لكنهم متفرقين

من غير عينين

رصيف سرير

والنوم عزيز

يخطف عيال البياعين





يعرق بنات  
من غير ولاد  
تلمع عيون المشتاقين  
قلوب بتخود ع الشمال  
وقلوب بتهرب م اليمين  
والنبض عالي وصوت جرس  
وصراخ عيال  
لما صاحبهم حط جون  
فاكرينه محسوب للجميع  
صرخ وقال: جوني أنا!  
وصوت فظيع  
حبات عرق  
وقعت على الأسفلت تنزف منهم





إيدين تحوش العسكري  
رجلين بتهرب زيهم  
بس الحگم مش راضي ينهي الماتش

والماتش  
قرر يعتصم  
كل العيال مستغربين  
الأرض بلعت كل شيء  
ما فيش طريق  
الصحرا قبضت ع الحياة  
وما عادش فاضل غير جمل  
هو السفينة للنجاة  
روح الحياة





ولا حد يعرف جه منين  
هو الأمل  
الأرض رمل  
ما فيش لا كورة ولا فريق  
بس العيال هيكمّلوا  
وهيلعبوا  
هيغنّوا غنوة بحسّ واحد  
ويلقّوا حوالين الجمّل





## قراءة ودين

الأستاذ محمد طه مدرس اللغة العربية  
والتربية الدينية في مدرستي «ابن خلدون  
الابتدائية» الذي كان يشبه الأنبياء والصالحين،  
وكان -رحمة الله عليه- وقورًا، وله من  
الوقار والهيبة ما لم أره في حياتي حتى الآن.

٢/٤

دا أول فصل ع السلم

وكان فصلي

وكان للفصل باب مكسور

كأنه حزين

وقلب كبير ما لوش مفتاح





وحوش المدرسة أمواج

بتتلاطم

فنتلاطم

وحرب تدور

جِدَاشِر دَكَّة مكسورة

خشبها سلاح

وسورة واحدة م القرآن

بتتسند على الحيطه

ومش عارفين

يا عالم مين بيسند مين

وصوت زيطة

بتهرب لما تسمع صوتك الرنان

محمّد طه كان إنسان





وكان صلواته م الرحمة

وروح رحمان

رقية صافية شفافة

أكيد يعلّم الأرواح

وعنده فصل في الجنة

وفيه ملايين

يعلمهم قراءة ودين

طابور الصبح في الجنة

ونقرا نشرة الأخبار

وكام واحد من الأبرار

سجين أصبح من الأحرار

وروحه سحابة جاية لنا

تمطرّ تغسل السموات







فتنزل رحمة م الجنة  
على الأرض اللي محبوسة  
تطهرها  
تحرّرها تنجّيها  
توصلها  
لنبض كلامك المحفور في وجداننا  
رسمت ف قلبنا جنة  
وجيش جرّار من الصالحين  
يعلمنا قراءة ودين





## أرواح كثير

للضحك روح  
والابتسام  
أرواح كثيرة عارفة بعض  
صوت العياط  
ضحك السماوات  
لما كانت أسئلة  
ومش لاقية رد  
وقت امّا كانت جنّتي  
مش لاقية حد  
قمت اخترعت لدمعتي  
الأبّ ورد  
والأمّ أرض





وأخوات نجوم  
أنا ابن هذا السرب  
قلبي مداين حب  
عمره ما راح الحرب  
ولا يعرف العداوات  
مهما حصل باضحك  
وانا ضحكي كُلُّه عياط





## أبويا

بتوحشني

باحسّ بروحك الي محاطة كل البيت

ما زالت تحرس الشمس الي ساكنة فُ سُبْحَتِكَ حَبَّات

تنوّر لي إذا مرّيت

في سكة ضلّة من غيرك

وتهديني

إذا ضلّيت

ألاقي منبّهك أجراس

والاقي كلمتك حُرّاس بتحميني

ترجّعني لحد مقامك العالي

والاقي الدنيا باصّة لي

قناة من قلب هذا النهر





كلامك عذب  
يرويني  
ينور لي  
ويهديني  
يخلي ليلي ينزل لي  
ويظهر لي  
شعاع م النور  
كإن الشمس سكنت فيه  
بتهرب عتمته وتدوب  
وتبقى الدنيا عز الضُّهر  
كلامك مهر  
ولسّا رحلتي طويلة  
ولسّا زادي من روحك





## خرايط روحك

ضاعت مني خرايط روحك  
تهت  
مش عارف أمشي مين  
وأروح على فين  
أنا عاوز سكة تودّي لّصّي  
وأنا امسك فيها  
وأزرع شمس تنور حيّ  
من بعد ما قمرّك غمّض عينه  
ما احناش شايفينه  
ما بقاش فيه ليل  
ولا حتى نهار بيصبرنا  
ويقول أنا جيّ





وانا باجْرى ما بين لاتنين  
وكأنه سباق  
وانا شجرة  
بيتساقط منها الأوراق  
ما نُهاش ألوان  
مليانة وشوش  
ما فيهاش أشواق  
ولا واحد فيها يشبهني  
مش لاقى مكان  
ولا حِلْم يطبط ع الصاحي  
ولا حتى رتوش  
لملامح سكة توديني  
وانا على ديني  
وُمش لاقى وشوش  
ومصمم اكْمَل للآخر  
لو شفت أمارَة





بدال ما امشي  
أنا ممكن اطيّر  
دوّرت كثير  
لو بحر أعوم  
أنا عاوز حاجة توصلني  
وكلام مفهوم  
أنا أول غارة  
لحرب طويلة  
لكن مهزوم







## ظلام الروح

وما زِلْتُ وحدك وسطهم  
جَوَّاءَ صحاري موحشة  
جَوَّاءَ عطش بتحن ليه  
وجعان قوي  
دائمًا جعان  
وقملي تاكل قلبك المليون مرار  
مليون حنان  
شكلك سعيد  
وانت اللي قاعد تمضغه  
مع إنه مرّ  
وأمرّ من إنك تكون إنسان غبي  
بتحبّه ليه؟! <sup>بَتَحِبُّهُ لِيَهْ؟!</sup>





واعدت على طعم المرار  
لو مية نهار  
بتشوفه ليل  
فرحان بانك مختطف  
غرقان ذهول  
مبسوط بغلطة غلتطها  
ورافض تزول  
رافض لفكرة حلها  
رافض نزول الشمس من فوق السطوح  
واقف لها  
مانع بجسمك ضيها  
رافض عبيرها يفوح  
والضلمة لَمَا سألتها عن إسمها  
قالت «ضياء»  
صدقتها  
هربت طيور الحنة خيفة م الظلام





رَجَّعْتُهَا  
فَهَمَّتْهَا إِنْ الْقُلُوبَ بِتَشَعِّ نَوْرٍ  
أَقْنَعْتُهَا  
مَنْ وَقْتُهَا وَالْكُونِ غِبَارٍ  
وَالْقَلْبَ ضَلَمٌ لِلْأَبَدِ  
وَمَا فَيْشِ أَمَلٍ  
يَهْرَبُ شِعَاعٌ مِنْ لَيْلِكَ الْيَّاسِرِ  
وَبَيُوهِمُكَ إِنَّهُ النَّهَارُ





## الشمس نائمة معيطة

الشمس نائمة معيطة  
ودموعها على كتف النهار  
تخفي الضياء  
الشمس هربت م السما  
ما لقيتش بيت  
سكّنت قلوب الأوليا  
حلفت برحمة ربنا  
حلفت بكل الأنبيا  
لا ف يوم هترجع للحياة  
إلا امّا ترجع ضحكك





اللي انتِ منها بتهرّي  
أنا قلبي حافظ سكتك  
العشق دينه ومذهبي  
دا الحب رحمة للقلوب  
والبسمة سُنّة عن النبي





## حلم متفسر

عَزَلْتُ الشعر وحبسْتُه  
في غابة كنت بابنيها  
في كوكب كنت مكتشفه  
وكان أخضر  
كان ألوان كثير جداً  
باشوفها كلها أخضر  
وكان قلبك مكان الشمس بينور  
يطرطش ضيَّ ع الشارع  
فتيجي الضلمة تتصوّر





وباتصوّر

في نص اللوحة انا بينكم

ملاحى تشبه السهم اللي مرسوم حفر

على الشجرة

في وسط القلب ع الصورة

شهيد الحب

أول حرف من إسمك

بيحضن حرف تاه مني

وصاليني

برغم اني يا دوب فكرة

وقلنا وقتها ذكرى

حفرنا القلب بقلوبنا

وقلنا بكرة نفتكره





ما جاش بُكرة  
ومهما نحبّ أو نكره  
هي فضل قلبي متعلّق  
وقلبك بالفروع ماسك  
كما العاشق  
كما الناسك  
وقلبي سبحتك تضوي  
لكن مصلوب على الشجرة  
وعارف إن انا مقصّر  
وباطفي دهشتي منك  
وباخطف دهشتك سلّم  
عليه أطلع  
واجيب لك حلم متفسّر







يطير منه شعاع يوصل  
لقبل ما تنتهي قدمك  
وتتعرّس  
في نجمة من بنات الشمس  
عاشقاني  
وعارفة إن انا أكبر  
طريق محفور في وجدانك  
عملت مظاهرة علشانك  
عشان أصغر  
وأشبه لك.





## غزة إيديها في إيد الله

أرواح تتفجّر

فتنوّر

تولد أرواح

وحياة بتدوم

ولا حدّش يقدر ينهيها

بتدوس الحزن برجليها

وتقيم أفراح

أنا كل دقيقة باروح غزة

علشان أرتاح

وباعمرها

وابني لها بيوت





وازرعها عيون  
نظرتها رصاص  
بتشعّ بارود  
بتدمّع ناس  
تتحدّى الموت  
أنا رايع بكرة احضن غزة  
واغسل عاري  
وافرح  
وأموت  
يمكن أرتاح  
وأموت ازاي؟!  
إزاي راح ترضى وتسمح لي؟!  
ممنوع الموت  
ممنوع الحزن





بتحوّط على قلبي وروحي

وبتحميني

وتغطّيني

لما الرعد يطر فوقنا

وتخبيني

جوّا عينيها

ألقي القدس جموع وصلاة

أنا مش خايف لحظة عليها

أنا متطمّن

لسّا شايفها

وهي بتضحك

وبتتمشّي

غزة إيديها في إيد الله





## السيرة الذاتية

عماد سالم

- شاعر وكاتب مسرحى وروائى مصرى، وُلِدَ فى السادس من ديسمبر ١٩٦٩ فى قرية العلاقمة - مركز ههيا - محافظة الشرقية .
- دَرَسَ بكلية الحقوق جامعة القاهرة .
- مالك مؤسسة يسطرون الشهيرة فى مصر والعالم العربى.
- مؤسس ملتقى يسطرون الثقافى، ومؤسسة يسطرون للطباعة والنشر والتوزيع، وتولى رئاسة مجلس إدارة المؤسسة من ٢٠١٠ وحتى الآن.
- أسهم فى الحركة الثقافية المصرية، فأسس جماعة النيل الأدبية ٢٠٠٨ .
- مؤسس حركة شعراء العامية الجديدة .
- عضو اتحاد كتاب مصر .
- مقرر اللجنة الثقافية باتحاد كتاب مصر مدة ثلاث سنوات، وعضو لجنة العامية فى اتحاد كتاب مصر، وفاحص معتمد فى اتحاد الكتاب المصرى والمسابقات المحلية والدولية.
- رئيس لجنة التحكيم فى مسابقة أمير الشعراء فى جامعة القاهرة ٢٠١٣ - ٢٠١٤ م.





- رئيس مهرجان شعراء العامية الجديدة، ثمانية دورات متتالية.
- عضو اتحاد الناشرين - عضو جمعية الأدباء .
- عضو المنتدى الثقافي المصري .

أهم الإصدارات:

-أولاً: الروايات:

- ١- ليزا .
- ٢ - أبو خشبة .
- ٣- كعابيش .
- ٤ - يهودي في شارع الغجر ( أديفا ) .
- ٥ - بيت الزناتي .

ثانياً: المسرح :

- ١ - مسرحية : إنسان ملاك .
- ٢- مسرحية : رقصة يناير .
- ٣- مسرحية : عودة الأميرة .
- ٤ - مسرحية : فرحة الغلبان .
- ٥- مسرحية : أحلام عبد الراضى .





- ٦ - مسرحية : جوز حبيبتى .
  - ٧ - مسرحية : عالم غريب .
  - ٨ - مسرحية : فستان فرح .
  - ٩ - مسرحية : ناشط سياسى .
  - ١٠ - مسرحية : مجانين فى خطر .
  - ١١ - مسرحية : الرجل الأحمر .
  - ١٢ - مسرحية : ليالى .
- ثالثاً: الشعر :
- ١ - تلغراف.
  - ٢ - غيطان الليل ( أغانى مصرية ) .
  - ٣ - الحب فى ميدان التحرير.
  - ٤ - أسرار مُريد.
  - ٥ - مركب أفكار.
  - ٦ - أمى راحت للملايكة.
  - ٧ - ليه يَمُوتَ الشُّعْرَا؟!





- رابعًا: الكتب:

- ١ - آخر محطة للوطن (مقالات نشرت في أهم الصحف المصرية والعربية: الشروق، اليوم السابع، الفجر، الوفد، الديار، السياسة الكويتية، وغيرها).
  - ٢- العامية الجديدة ( الكتاب الأول ) الخروج بنصوصهم عن النسق
  - ٣- العامية الجديدة ( الكتاب الثانى ) تأملات في الشعر الجديد
- وله تحت الطبع : في ظلال الأدب .

صدرت حول مؤلفاته العديد من الدراسات منها :

- ١ - ( ليزا ) عماد سالم .. قراءة في تاريخ الحركة الإسلامية .. والعودة إلى ( واقعية القاع ).. د / حسام عقل : رئيس ملتقى السرد العربى .
- ٢ - ( ليزا ) عماد سالم .. الشخصية المصرية قبل الطوفان .. د عبدالرحيم درويش :أستاذ الدراما، ورئيس قسم الإعلام بجامعة دمياط والوادي الجديد .
- ٣- مسرح عماد سالم وعامله والموشى بالأرق ... الكاتب والناقد المسرحى. د / أمين بكير .







## الفهرس

٣	مقدمة .....
٩	أول طريق للأرض .....
٥١	ليه يَمَوِّت الشُّعْرَا؟! .....
١٨	جبريل ما جاش .....
٢٢	الخلق بيوت .....
٢٩	الليالي الأربعين .....
٣٥	اضربوه ببعضها .....
٤٠	الشجرة .....
٤٤	الغار .....
٤٨	الأحلام رغيـف .....
٥٣	أرواح الحزن .....
٥٦	روح خضرا .....
٥٨	رصيف .....
٦٢	قراءة ودين .....
٦٦	أرواح كثير .....
٦٨	أبويا .....





- ٧٠ ..... خرايط روحك  
٧٣ ..... ظلام الروح  
٧٦ ..... الشمس نائمة معيطة  
٧٨ ..... حلم متفسر  
٨٢ ..... غزة إيديها في إيد الله  
٨٥ ..... السيرة الذاتية

